



Inatsisartuni ilaasortaq  
Lars Poulsen, Siumut  
/Maani

**§ 37 naapertorlugu Tunumiit Danmarkimut arferit neqaannik  
eqquassinissamut inerteqquteqarneq pillugu apeqquteqaammut nr. 155-  
2021-mut akissut**

Brevdato: 02-12-2021  
Sagsnr.: 2021 - 20605  
Akt-id: 18554476

Postboks 1614  
3900 Nuuk  
Tlf.: (+299) 34 50 00  
Fax: (+299) 34 54 10  
E-mail: pan@nanaq.gl  
www.naalakkersuisut.gl

Asasara Lars Poulsen

Inatsisartut suleriaasianni § 37, imm. 1 naapertorlugu Tunumiit Danmarkimut arferit neqaannik eqquassinissamut inerteqquteqarneq pillugu Naalakkersuisunut apeqquteqaateqarputit. Apeqqutitit uannit akisassanngorlugit innersuunneqarput.

**1. Nunatta kangianiit (tunumiit) umiarsuakkut Danmark-imut  
nassiussinermi tikaagulliup (sildepisker) Neqaa, Mattaa Qiporaalu kiisalu  
Qilalugaq qaortap nassiunneqarsinnaanngineranut sumik pissuteqarpa,  
aallaaveqarpa?**

**Akissut:**

Qilalukkat qaortat Tunumi pisarineqaqqusaanngillat, taamaattumillu qilalukkat qaortat Tunumi pisarineqarsimasut neqaannik nassiussisoqaqqusaanngilaq.

Tikaagulliit Tunumi pisarineqarsimasut neqaannik mattaannillu Danmarkimut nassiussineq inerteqqutaavoq, Tunumi tikaagulliit nungutaanissamut ulorianartorsiormata. Tamanna CITES-imut isumaqatigiissut (Washingtonimi isumaqatigiissut) aqutigalugu maleruagassiuunneqarpoq. CITES-imut isumaqatigiissut nunani tamalaani uumasut naasullu nujuartat niuerutigineqarnerannut maleruagassanut nunat tamalaat akornanni isumaqatigiissutaavoq. Uumassusillit nungutaanissamut ulorianartorsiornepaasut nunanit isumaqatigiissummut ilaasunit anniseqqusaanngillat eqquteqqusaanatillu. Kalaallit Nunaat Danmarkilu aamma nunat 200-t missaanniittut allat isumaqatigiissummut ilaapput.

Aamma apeqqutivit akinissaanut Aalisarnermut Piniarnermullu Naalakkersuisoqarfik isumassarsiniarfigineqarpoq. Aalisarnermut Piniarnermullu Naalakkersuisoqarfik ilisimatitsivoq:

”Nunani Tamalaani Arfanniarnermut Ataatsimiititaliarsuup (IWC-p) Kalaallit Nunaata Kitaani Kangianilu arfernik angisuunik, taakkunungalugu ilanngullugu tikaagullinnik piniarnermut akuersinermi taakku najukkani atugarineqarnissaat,

aammalu immikkoortup ”nunap inuiisa arfanniartarneri”-sa ataani niuerneramik siunertaqarfiunngitsumik anninneqannginnissaat piumasaqaatigaa”.

## **2. Inatsit peqqussutaasoq Tikaagullimmik Qilalugaq qaqortamillu nassiusseqqusaannginnerup allanngortinneqarnissaa nassiussoqarsinnaalernissaanik (Nunatta Kitaanisulli) pilersaaruteqartoqarpa?**

### **Akissut:**

Uumassusillit ulorianartorsiortut niuerutigineqarneri pillugit nunani tamalaani isumaqatigiissutip allanngortinneqarnissaanik pilersaaruteqartoqanngilaq. Kalaallit Nunaat isumaqatigiissummut ilaammat, Kalaallit Nunaata isumaqatigiissummi aalajangersakkanik malinninnissani pisussaaffigaa. Aamma nunat CITES-imut isumaqatigiissummut ilaasut uumassusilinnik nungutaanissamut ulorianartorsiornerpaanik eqqussinissamut akuerseqqusaanngillat. Tassalu Tunumiit tikaagulliit neqaannik Danmarkimut eqqussinissamut akuersissuteqartoqarsinnaanngilaq.

Kitaaniit qilalukkanit qaqortanit tikaagullinnillu tunisassianik annissinissamut eqqussinissamullu akuersissuteqartoqarsinnaavoq, uumassusillit taakku amerlasuukkaaneersuummata, taamaalillutillu nungutaanissamut ulorianartorsiortuneersuunatik.

Aamma apeqqutivit akinissaanut Aalisarnermut Piniarnermullu Naalakkersuisoqarfik isumassarsiniarfigineqarpoq. Aalisarnermut Piniarnermullu Naalakkersuisoqarfik ilisimatitsivoq:

”IWC ilaatigut tikaagullinnik pisassanik aalajangersaasarnermut piumasaqaatinik allannguinissamik pilersaaruteqanngilaq”.

## **3. Qanga peqqussut atuutsinneqalerpa?**

### **Akissut:**

Annissinissamut/eqqussinissamut aalajangersakkat nunat tamat akornanni uumasut nujuartat aamma nunami naasut nungutitaanissamut ulorianartorsiortitaasut niuerutigineqartarnerat pillugu isumaqatigiissut (CITES-imut isumaqatigiissut) 3. marts 1973-imeersoq tunngavigalugu uumasut nujuartat aamma nunami naasut il.il. anninneqartarnerat eqqunneqartarnerallu pillugit Namminersornerullutik Oqartussat nalunaarutaat nr. 12, 13. september 2004-meersoq naapertorlugu atuutsinneqalerput. Kalaallit Nunaat 1977-imili isumaqatigiissummut ilaavoq. Nalunaarut una aqutigalugu pissarsiarineqarsinnaavoq: [www.lovgivning.gl](http://www.lovgivning.gl).

Aamma apeqqutivit akinissaanut Aalisarnermut Piniarnermullu Naalakkersuisoqarfik isumassarsiniarfigineqarpoq. Aalisarnermut Piniarnermullu Naalakkersuisoqarfik ilisimatitsivoq:

”IWC 1983-imi arfermik angisuunik pisaqartarnermik unitsitsigallarnermik atuutsilerserpoq, tamatumalu kingunerisaanik niuerneramik tunngaveqarluni piniarnej aamma annissineq/eqqussineq unitsinneqarput..

Tamatuma saniatigut arfernik angisuunik illersuineq piniarnerlu pillugit Namminersorlutik Oqartussat nalunaarutaanni nr. 9-mi, 6. december 2018-imeersumi § 37-mi CITES-imut isumaqatigiissut (Washingtonimi isumaqatigiissut) innersuunneqarpoq.”

Inussiarnersumik inuulluaqqusillunga

  
Kalistat Lund



17. november 2021

Inatsisartut suleriaasianni § 37, imm. 1 naapertorlugu matumuuna Naalackersuisunut imaattumik apeqquteqassaanga:

**Naalackersuisunut apeqqutit:**

- 1. Nunatta kangianiit (tunumiit) umiarsuakkut Danmark-imut nassiussinermi tikaagulliup (sildepisker) Neqaa, Mattaa Qiporaalu kiisalu Qilalugaq qaqortap nassiunneqarsinnaanngineranut sumik pissuteqarpa, aallaaveqarpa?**
- 2. Inatsit peqqussutaasoq Tikaagullimmik Qilalugaq qaqortamillu nassiusseqqusaannginnerup allanngortinneqarnissaa nassiussisoqarsinnaalernissaanik (Nunatta Kitaanisulli) pilersaaruteqartoqarpa?**
- 3. Qanga peqqussut atuutsinneqalerpa?**

(Inatsisartunut ilaasortaq Lars Poulsen, Siumut)

**Tunngavilersuutit:**

Ukiumut tikaagullit pisassiissutigineqartartut taama amerlassuseqartillugit, nunatsinni innuttaasut nunatta avataanut nassiussisinnaanissaminnut periarfissaqartariaqarpoq.

Ullut qulit suliffiusut iluanni akineqarnissara kissaatigaara.